

# BUKTI ARKEOLOGI SEBARAN ISLAM DI SEMENANJUNG MALAYSIA

**MOHAMAD HANIF HJ MD NOOR**

nhanif2a@gmail.com

Fakulti Seni Lukis & Seni Reka (FSSR)  
Universiti Teknologi Mara , Cawangan Perak ,  
Kampus Seri Iskandar

## **ABSTRAK**

Pensejarahan berkaitan penyebaran Islam tercatat dalam banyak manuskrip dan buku sejarah lama. Namun begitu, catatan sejarah tersebut masih boleh dipertikai kesahihannya selagi pembuktian pensejarahan tersebut dilaksanakan. Matlamat utama penulisan ini adalah untuk menghimpunkan bukti arkeologi berkaitan penyebaran Islam di Semenanjung Malaysia. Kajian ini disusun dari catatan sejarah awal dan teori penyebaran Islam ke Malaysia. Penerangan berbentuk kronologi penyebaran Islam dilaksanakan oleh penyelidik dari kerajaan ke kerajaan (Acheh, Samudera-Pasai, Melaka) di rantau Tamadun Melayu. Selain itu, pensejarahan berkaitan kerajaan penting (Johor, Terengganu, Manjung, Kelantan, Perak dan Beruas) di Semenanjung Malaysia dijelaskan dalam penemuan penulisan sejarah. Selepas itu, pembuktian kewujudan Islam berdasarkan pengaruh kerajaan yang diceritakan berdasarkan penemuan artifak penting (inskripsi papan batu, batu bersurat, batu nisan) yang tercatat atasnya tentang penerangan penting (nama, tahun, bentuk artifak yang memiliki pengaruh). Kajian ini akan memberi satu takrifan baru dalam meletakkan topologi kedatangan Islam di Semenanjung Malaysia. Kajian ini juga diharap dapat menjadi rujukan penting dalam usaha penyusunan semula sejarah Malaysia khususnya dan sejarah Alam Melayu umumnya.

Kata kunci : Arkeologi, Penyebaran Islam , Semenanjung Malaysia

## Pengenalan

Penyebaran Islam di Asia Tenggara amnya bermula sejak zaman kerajaan Umayyah dan Abbasiyah lagi. Pemimpin dua kerajaan Islam itu telah menghantar ratusan mubaligh untuk berdakwah di sepanjang perjalanan perdagangan mereka ke Asia Tenggara. Perdagangan Arab – Nusantara bermula pada abad ke-3 Masihi lagi melalui jalan darat dan laut. Menurut Badri (1993), Islam telah tersebar di Asia Tenggara pada akhir abad ke-7 Masihi. Nusantara menjadi tumpuan para pendakwah Islam pada waktu itu kerana kemudahan pelayaran daripada pihak pedagang Arab yang berulang alik ke Asia Tenggara dan Timur Jauh. Peluang ini telah digunakan oleh mereka untuk menyebarkan syiar Islam sehingga ke negara China.

## Teori Penyebaran Islam ke Malaysia

Penyebaran Islam ke Nusantara dipercayai melalui tiga cara iaitu penyebaran melalui pelayar Arab, pendakwah dari negara China dan pendakwah dari India (Peta 1). Pelayar Arab Islam mula bermukim di Sumatera Utara pada abad ke-7 Masihi. Ada pendapat yang mengatakan satu perkampungan Arab telah wujud di Barus, Sumatera Utara pada abad itu. Sesetengah kumpulan pelayar ini mengambil kesempatan untuk berdakwah sementara menunggu musim pelayaran ke negara China pula untuk meneruskan misi perdagangan mereka. Mereka telah meyampaikan dakwah di kalangan pedagang di pelabuhan Perlak dan sekitarnya. Pada waktu yang sama ada di antara mereka yang sempat berkahwin dengan wanita tempatan dan ada di kalangan mereka yang menjadi warganegara Perlak. Dengan sebab itu penyebaran Islam di Sumatera Utara menjadi pantas dan berterusan apabila memasuki abad ke-9 Masihi.

Orang-orang Cina yang beragama Islam telah memainkan peranan sebagai pendakwah dan telah menyebarkan Islam di kalangan masyarakat Nusantara pada abad ke-9 Masihi selepas teretusnya kekacauan oleh Hwang Chao di Canton yang menyebabkan ramai pedagang Islam melarikan diri ke Champa, Kedah dan Palembang. Ini telah mengukuhkan lagi sebaran Islam oleh orang-orang Arab di Nusantara pada waktu itu.

Pelayar-pelayar Arab juga telah singgah di pelabuhan Gujerat, Benggala dan Malabar, India Selatan dan menyebarkan Islam secara langsung di kalangan penduduk tempat di situ. Mubaligh Islam-India yang mengikuti pelayar-pelayar ke Nusantara pada abad ke-13 Masihi pula telah menyebarluaskan ajaran Islam di kalangan masyarakat Nusantara secara aktif. Di antara negeri yang menerima dakwah mereka di antaranya Samudera-Pasai, Kedah, Palembang, Demak dan Champa.

## Kerajaan Awal Islam dan Penyebaran Islam di Semenanjung Malaysia

Penyebaran Islam secara lebih luas selepas era pedagang Arab, Cina dan India telah diteruskan oleh kerajaan-kerajaan tempatan di Asia Tenggara seperti kerajaan Samudera-Pasai (abad ke-12 hingga 14 Masihi), kerajaan Melaka (abad ke-15 dan 16 Masihi) dan kerajaan Aceh (abad ke-17 Masihi). Pada abad ke-18 Masihi, Penyebaran Islam telah diteruskan oleh mubaligh dari Hadramaut, Yaman.

### Penyebaran Islam Samudera-Pasai Abad ke-12 hingga 14 Masihi

Pada abad ke-12 Masihi, Samudera-Pasai menjadi pusat perdagangan yang terpenting di Asia Tenggara selepas runtuhnya empayar Srivijaya pada tahun 1023 Masihi. Di sini Islam telah berkembang dengan pesat dan menjadi pusat penyebaran Islam yang penting di Asia Tenggara. Dari sini, Islam telah tersebar secara pantas ke Aceh, Beruas, Melaka, Aru, Deli dan Jawa Tengah.


### Penyebaran Islam Empayar Aceh Abad ke-17 Masihi

Selepas Melaka ditawan oleh Portugis pada tahun 1511, Aceh pula menjadi pelabuhan utama di rantau Asia Tenggara dan pada waktu yang sama, Aceh menjadi pusat perkembangan Islam yang terpenting. Kerajaan Aceh meluaskan wilayah Islam ke Fansuri, Perak, Padang, Indrapura dan Siam

## Kerajaan Terengganu

Pada abad ke-12 Masihi muncul kerajaan Terengganu atau Fo-lo-an (Cina) di Pantai Timur Semenanjung Tanah Melayu. Catatan Ling-wai Tai-ta karangan Chao Chu-fei pada tahun 1178 Masihi, ada menyebut tempat yang bernama Fo-lo-an. Ahli sejarah tempatan mengenali Fo-lo-an sebagai Kuala Berang yang terletak di tepi Sungai Terengganu sebagai pelabuhan utama di Asia Tenggara pada zaman kejatuhan empayar Srivijaya. Hasil eksport kerajaan ini ialah kayu laka, kapur barus, lilin, madu dan kulit penyus. Barang-barang yang diimport ialah porselin biru-putih, kapas, sutera, timah dan arak.


Pada abad ke-14 Masihi, agama Islam telah sampai ke Terengganu. Ini dapat dibuktikan dengan batu bersurat Sungai Tersat tertulis tarikh 702-789 Hijrah yang bersamaan dengan tahun 1303-1387 Masihi (Buyong, 1980). Satu abad kemudian, Kerajaan Melaka telah menguasai kerajaan Terengganu sehingga kedatangan Portugis pada tahun 1511 Masihi




Peta 1: Penyebaran Awal Islam di Nusantara dari Arab, India dan China



Peta 2: Penyebaran Islam Zaman Kerajaan Samudera-Pasai



Peta 3: Penyebaran Islam Zaman Kerajaan Melaka



Peta 4: Penyebaran Islam zaman Kerajaan Aceh

### Kerajaan Johor

Kerajaan Johor telah dikuasai oleh kerajaan Melaka seawalnya pada tahun 1411 Masihi seperti dalam catatan Eredia (1512 Masihi). Semasa Portugis menyerang Melaka pada tahun 1511 Masihi, Sultan Melaka, Sultan Mahmud Syah telah melarikan diri ke Johor dan membentuk kerajaan Melayu Johor (Hanizah, 1997). Dengan sebab itu, Johor telah diserang oleh Portugis pada akhir tahun 1511 Masihi. Johor sekali lagi diserang oleh Portugis pada tahun 1536 Masihi, semasa Johor diperintah oleh anak Sultan Mahmud, Sultan Alauddin Riayat Syah II dan Johor berdamai dengan Portugis. Kerajaan Aceh tidak senang dengan keadaan ini, telah menyerang Johor pada tahun 1564 Masihi dan menawan Johor hingga abad ke-17 Masihi.

### Kerajaan Manjung

Manjung terletak di bahagian tengah Pantai Barat Semenanjung Tanah Melayu iaitu di kawasan muara Sungai Dinding. Ianya dipercayai telah wujud seawal-

lewatnya pada tahun 1335 Masihi berdasarkan catatan Kesah Raja-Raja Pasai (Abdullah, 1963) yang menyebut bahawa Sultan Malik al-Zahir II (1326-1350) telah mengusir saudaranya Sultan Malik al-Mansur (1326-1336) ke Manjung. Pada waktu ini, Manjung telah bebas daripada cengkaman kerajaan Siam Sukhothai. Adalah dipercayai bahawa Manjung telah membuat hubungan dagangan dengan pedagang-pedagang luar sebelum Beruas mengambil alih pelabuhannya pada tahun 1499 Masihi (Moorhead, 1959). Dengan sebab itu Manjung telah dipanggil dengan berbagai nama seperti Myjam, Minjam, Micham, Michim, Mican dan Imchon. Dalam catatan Tome Pires pada tahun 1512 Masihi, Manjung dipanggil sebagai Mjmmam (Wheatley, 1961). Pada zaman kerajaan Gangga Negara, kawasan Manjung memang kaya dengan hasil bijih timah. Kerajaan Manjung yang wujud pada abad ke-14 Masihi itu telah mewarisi pengeluaran bijih timah yang terpenting di Semenanjung Tanah Melayu sehingga abad ke-16 Masihi seperti mana yang telah dilaporkan oleh Tome Pires pada tahun 1512 Masihi. Menurutnya lagi,

Manjung telah menjadi sebahagian dari wilayah Beruas dan membayar sejumlah 8,000 calains timah setahun kepada Melaka.

Manjung dan Beruas adalah dua buah kerajaan yang berjiran dan mempunyai kepentingan perdagangan yang sama iaitu pengeksport bijih timah yang penting di Semenanjung Tanah Melayu. Kedua-dua kerajaan ini sering bermusuhan di antara satu sama lain sehingga tercetus peperangan saudara sebelum tahun 1499 Masihi. Beruas telah memohon bantuan ketenteraan daripada kerajaan Melaka untuk mengalahkan Manjung. Manjung dapat dikuasai oleh Beruas pada tahun 1499 Masihi dengan campur tangan Melaka. Justeru itu, Manjung terpaksa membayar cukai sejumlah 8,000 calains timah setahun kepada Melaka.

### **Kerajaan Kelantan**

Kerajaan Kelantan telah wujud pada abad ke-7 Masihi yang dikenali dengan nama Tan-Tan. Kerajaan ini berdagang dengan China sehingga dikuasai oleh Sriwijaya pada abad ke-13 Masihi dan Majapahit pada abad ke-14 Masihi.

Kerajaan Kelantan dipercayai telah menerima Islam pada abad ke-12 Masihi iaitu sebelum kunjungan pelayar Islam Ibn Battutah pada tahun 1297 Masihi. Menurut beliau, kerajaan Kelantan pada waktu itu diperintah oleh seorang raja perempuan yang bernama Urduja (Rahman, 2006).

### **Kerajaan Beruas**

Selepas tiga abad Gangga Negara musnah, maka muncul pula kerajaan Melayu Beruas sebelum abad ke-15 Masihi (Wilkinson, 1971). Pemerintahnya dipercayai berasal dari keturunan Sultan Malik al-Salleh dari Samudera-Pasai, Sumatera (Ishak 2008). Bukti yang ada ialah batu nisan Aceh yang terdapat di Makam Raja Beruas I dan II di Kampung Kota dan lain-lain tempat di sekitar mukim Beruas (Supraytino, 2010).

Kerajaan Melayu Beruas telah membina semula Beruas sebagai pelabuhan entrepot antarabangsa di bawah penguasaan Melaka. Beruas mengeksport bijih timah, perahu dan hasil perhutanan yang terkenal. Catatan Arab mengatakan bahawa Beruas menghasilkan bijih timah sejak abad ke-9 Masihi. Berdasarkan catatan Portugis (1512), Beruas mempunyai penduduk yang ramai dan merupakan pusat perniagaan (Fawzi, 1986). Namun demikian Beruas telah menerima pengaruh luar dalam kerajaannya. Empayar Melaka telah berkuasa sepenuhnya ke atas kerajaan Beruas dalam perdagangan dan perlombongan bijih timah. Tome Pires, 1512

Masihi (Cortesao, 1944) telah menyatakan bahawa Beruas telah membayar cukai kepada Melaka sebanyak 6,000 calains timah setahun sebelum kedatangan Portugis lagi.

Hubungan Beruas dan Melaka bertambah erat apabila wujud perhubungan persaudaraan dalam kalangan istana pada awal abad ke-16 Masihi. Pada mulanya, Tun Isap Barakah (Bendahara Melaka) telah berkahwin dengan Puteri Siat (adik kepada Raja Beruas, Tun Aria Bija Diraja) pada tahun 1500 Masihi. Kemudian pada tahun 1511 Masihi (sebelum Melaka ditawan Portugis), Tun Mahmud (anak Tun Isap Barakah) telah berkahwin dengan Tun Mah, anak Raja Beruas (Fawzi, 1986).

Setelah Portugis menguasai Melaka mulai pada tahun 1511 Masihi, maka seluruh taklukan Melaka lumpuh dari segi politik dan ekonomi. Beruas turut terjejas dan dikuasai oleh Portugis keseluruhannya. Raja Beruas, Tun Aria Bija Diraja telah melarikan diri ke Riau (Fawzi, 1986). Selepas itu tiada berita lagi tentang beliau.

Apabila sistem beraja lenyap, maka pemerintahan Beruas bertukar tangan kepada pembesar-pembesar daerah sehingga putera kedua Sultan Mahmud Syah dari Kampar (Melaka) yang bernama Raja Muzaffar Syah telah dipanggil untuk dipertuankan di Perak pada tahun 1528 Masihi sebagai sultan Perak yang pertama (Shellabear, 1986).

### **Kerajaan Perak**

Kerajaan Perak telah dibentuk pada tahun 1528 Masihi. Seluruh negeri Perak telah bersatu melantik anak Sultan Mahmud Syah (sultan Melaka yang terakhir), Raja Muzaffar Syah sebagai sultan Perak yang pertama dengan gelaran Sultan Muzaffar Syah (1528-1549 Masihi). Pusat pemerintahannya ialah di Tanah Abang (kini dipanggil Teluk Bakong), Bota di tepi Sungai Perak (Rahman, 2003). Bukti arkeologi lokasi itu ialah batu nisan jenis Aceh di Makam Sultan Muzaffar Syah I di Teluk Bakong.

Kerajaan Perak telah ditakluk oleh kerajaan Aceh pada tahun 1573 Masihi pada zaman pemerintahan Sultan Mansur Syah I (1549-1577 Masihi). Sekali lagi Aceh telah menakluk Perak dalam tahun 1619 Masihi iaitu pada zaman pemerintahan Sultan Mukaddam Syah (1603-1619 Masihi). Kerajaan Perak bebas daripada kongkongan kerajaan Aceh mulai pada tahun 1700 Masihi. Kerajaan Perak kekal hingga ke hari ini.

### **Bukti Arkeologi Penyebaran Islam Semenanjung**

Pada peringkat awal lagi, bukti kedatangan Islam ke Nusantara adalah berdasarkan jumpaan batu nisan, batu bersurat, duit syiling dan pentarikhan radiokarbon.

radiokarbon membuat bukti-bukti yang sedia ada menjadi lebih kukuh. Namun demikian tidak semua pentarikhan radiokarbon berjaya dilakukan pada setiap tempat di Asia Tenggara. Ia memerlukan masa, tenaga dan sumber kewangan yang mencukupi untuk kajian ini.

Bukti penyebaran awal Islam di Semenanjung Malaysia (Kedah) adalah berdasarkan inskripsi papan batu yang tertulis perkataan Ibnu Sardan yang bertarikh pada 213 H/829 Masihi (Foto 1). Papan batu itu dijumpai di Merbok, Kedah. Berikutnya penyebaran Islam di Pantai Timur Semenanjung Tanah Melayu (Terengganu) dengan bukti batu bersurat yang dipercayai ditulis pada tahun 1303 Masihi (Foto 2).



Foto 1 : Inskripsi papan batu Ibnu Sardan, Merbok, Kedah, 829 Masihi




Foto 2 : Batu Bersurat Terengganu 1303 Masihi

Di antara yang menarik perhatian ahli sejarah dalam perkembangan Islam di Nusantara ialah penggunaan batu nisan Aceh yang berleluasa di Indonesia, Malaysia, Thailand, Brunei, Filipina dan Vietnam. Batu nisan ini pertama kali diperkenalkan pada tahun 1907 oleh Jeragan Abdul Syukur dalam *Journal of the Malayan Branch of the Royal Asiatic Society* (No. 48). Pada tahun 1988, Othman Mohd Yatim telah mengklasifikasikan batu Aceh kepada 14 jenis mengikut status dan jantina simati. Jenis batu nisan itu dinamakan Othman A-N.

Pembuatan batu nisan ini memang bermula di Samudera-Pasai pada abad ke-13 Masihi iaitu batu nisan di Makam Malik al-Saleh di Lhokseumawe, Aceh (Othman, 1988) (Foto 3). Batu nisan ini tersebar ke negeri-negeri di Nusantara pada abad ke-13 hingga ke-18 Masihi. Pengaruh Islam telah tersebar bersama penggunaan batu nisan Aceh ke Pattani, Beruas, Melaka, Aru dan Demak.



Foto 3 : Nisan Sultan Malik al-Saleh, 1297 Masihi

Islam telah tersebar ke Beruas dari Samudera-Pasai melalui penghijrahan Sultan Malik al-Mansur pada abad ke-14 Masihi dan membentuk kerajaan Beruas di Kampung Kota. Bukti penyebaran Islam di sini ialah batu nisan di Makam Raja Beruas I dan II di Kampung Kota (Foto 4). Melaka telah menerima Islam semasa pemerintahan Sultan Muhammad Shah pada tahun 1414 Masihi. Antara lain bukti yang terdapat di Melaka ialah batu nisan Makam Sultan Mansur Shah (Foto 5).



Foto 4 : Batu nisan Aceh di Makam Raja Beruas II



Foto 6 : Batu nisan Aceh di Makam Sultan Abdul Jalil IV, kampung Panchor, Johor



Foto 5 : Batu nisan Sultan Mansur Shah Melaka

Penggunaan batu nisan Aceh ini bertambah banyak semasa kerajaan Aceh menjadi pusat penyabaran Islam di Nusantara yang bermula pada pertengahan abad ke-16 Masihi selepas kerajaan Melaka dikalahkan oleh Portugis. Kerajaan Aceh telah mengukuhkan lagi kedudukan Islam Di Nusantara hingga abad ke-19 Masihi sebelum ditawan oleh Belanda pada tahun 1903.

### Sumbangan Kajian Arkeologi Islam Malaysia

Kajian arkeologi sentiasa mementingkan pentarikan kronometrik melalui artifak yang ditemui semasa ekskavasi di sesuatu tapak kajian. Pentarikan ini biasanya menggunakan kaedah radiokarbon. Pemberian pentarikan itu membantu pengkaji sejarah menentukan tarikh sesuatu peristiwa berlaku dengan lebih tepat. Kebanyakan artifak batu nisan yang ditemui di Malaysia tidak tertulis tarikh kematian, namun masih boleh dipastikan tarikhnya dengan menggunakan teknik radiokarbon. Batu-batu nisan jenis Aceh yang ditemui di Kampung Kota, Beruas, Perak didapati tidak tertulis tarikh kemangkatan Raja Beruas. Tetapi setelah kajian arkeologi dijalankan terhadap batu nisan berkenaan dan artifak yang ditemui berhampiran dengan makam tersebut, maka tarikh yang ditemui ialah pada abad ke-14 Masihi (Suprayitno, 2010).

Kerajaan Melaka telah meluaskan lagi kawasan pengaruh Islam di Nusantara dengan menguasai Pahang, Manjung, Selangor, Johor, Siak, Kampar, Riau dan Bentan. Pengaruh Islam oleh kerajaan Melaka ini secara langsung telah menyebarkan penggunaan batu nisan Aceh di makam-makam kerajaan berkenaan. Bukti yang sangat jelas ialah batu-batu nisan di Makam Sultan Abdul Jalil IV Kampung Panchor, Johor (Foto 6).



Daripada hasil kajian arkeologi maka boleh dikenalpasti teori kedatangan dan penyebaran Islam di sesuatu tempat. Penyebaran Islam di Kedah dapat dikenalpasti bermula pada abad ke-9 Masihi dengan penemuan batu bersurat Merbok yang bertarikh pada 829 Masihi. Teori kedatangan dan penyebaran Islam di negeri Perak dipercayai bermula pada abad ke-14 Masihi dengan kedatangan Sultan Al-Malik Mansur dari Samudera pada awal abad ke-14 Masihi ke Manjung dan seterusnya ke Beruas (Hanif, 2011). Rekod arkeologi tentang kehadiran Islam di Semenanjung (Kedah) menyatakan dengan jelas seawalnya pada abad ke-9 Masihi yang bertepatan dengan rekod sejarah kedatangan Islam di Nusantara (Barus). Rekod arkeologi dan sejarah saling memerlukan dalam menentukan kesahihan peristiwa penting yang berlaku di dalam sesebuah negara. Kedua-dua rekod ini sentiasa di kemaskini supaya jitu dan tepat.

Kedatangan Islam di Nusantara berkait secara langsung dengan Malaysia dari segi cara penyebarannya. Ini kerana ianya berlaku secara menyeluruh di rantau Asia Tenggara termasuk Malaysia. Keadaan ini serupa kerana pedagang Arab dan India sentiasa menyinggahi setiap pelabuhan yang ada di seluruh pelusuk Nusantara pada setiap musim pelayaran mereka ke negara China. Kesempatan ini mereka ambil untuk menyebarkan ajaran Islam.

Hasil daripada kajian arkeologi, kita dapat mengenalpasti tokoh-tokoh yang menyebarkan ajaran Islam di Malaysia pada masa lampau. Tokoh Islam yang tidak asing lagi ialah Inbu Sardan berbangsa Arab dipercayai telah menyebarkan Islam di Kedah pada abad ke-9 Masihi. Batu bersurat dari Sungai Teresat, Terengganu yang bertarikh pada tahun 1303 Masihi membuktikan tokoh Islam dari Malayu, Sumatera telah mengembangkan Islam di sana.

## **Kesimpulan**

Awal kedatangan agama Islam ke Semenanjung Tanah Melayu berkait secara langsung dengan hal-hwal perdagangan bangsa Arab dengan Melayu. Tempat tumpuan sebaran Islam pada waktu itu adalah di kawasan pelabuhan. Usaha dakwah Islam ini telah disemarakkan lagi oleh gabungan pedagang dengan mubaligh dari negara China dan India. Kemunculan kerajaan-kerajaan hebat seperti Samudera-Pasai, Melaka dan Aceh telah menyebarkan lagi pengaruh Islam di kalangan negeri-negeri di Semenanjung Tanah Melayu. Kedatangan Islam dan penyebarannya di seluruh pelusuk Nusantara dibuktikan dengan jumpaan batu nisan dan batu bersurat yang bertulisan jawi. Batu nisan jenis Aceh sangat banyak ditemui di negeri Semenanjung Tanah Melayu dari abad ke-14 Masihi hingga abad ke-18 Masihi.

## Rujukan

- Abdullah Haji Musa Lubis, (1963). *Kesah Raja-Raja Pasai*. Kuala Lumpur: Pustaka Antara.
- Abdul Rahman Abdullah, (2003). *Sejarah dan Tamadun Asia Tenggara Sebelum dan Sesudah Pengaruh Islam*. Kuala Lumpur: Utusan Publications & Distributors Sdn. Bhd.
- Abdul Rahman Abdullah, (2006). *Sejarah dan Kebudayaan Asia Tenggara Tradisional*. Shah Alam: Karisma Publications.
- Badri Yatim, (1993). *Sejarah Peradaban Islam*. Jakarta: PT RajaGrafindo Persada.
- Buyong Adil, (1980). *Sejarah Johor*. Kuala Lumpur: Dewan Bahasa dan Pustaka & Kementerian Pelajaran Malaysia.
- Cortesao, A., (1944). *The Suma Oriental of Tome Pires, Vol. II*. London: Hakluyt Society Press.
- Fawzi Basri, (1986). *Cempaka Sari. Sejarah Kesultanan Negeri Perak*. Ipoh: Yayasan Perak.
- Hanizah Jonoh, (1997). *Senjata-Senjata Kesultanan Melayu Johor*. Johor Bharu: Yayasan Warisan Johor.
- Ishak Saad, (2008). *Bukti Arkeologi dan Sejarah Kewujudan Kerajaan Lama di Malaysia*. Pulau Pinang: Universiti Sains Malaysia.
- Mohamad Hanif Hj Md Noor., (2010). *Interpretasi Sejarah Kerajaan Gangga Negara dan Kerajaan Melayu Beruas dari Sudut Arkeologi dalam Prosiding Seminar Kebangsaan Penanda Arasan Arkeologi Institut Alam dan Tamadun Melayu Universiti Kebangsaan Malaysia, Julai 2010*.
- Mohamad Hanif Hj Md Noor., (2011). *Arkeologi di Daerah Manjung dan Larut-Matang-Selama: Kajian Kerajaan Awal*. Pulau Pinang: Penulisan tesis Phd. Universiti Sains Malaysia.
- Moorhead, F.J., (1959). *A History of Malaya and Her Neighbours*. London: Longmans.
- Muzaffar Hj Mohamad & Suzana Hj Othman, (2006). *Ahlul Bait Rasulullah SAW & Kesultanan Melayu*. Batu Caves: Crescent News (K.L) Sdn. Bhd.
- Nik Hassan Shuhaimi Nik Abdul Rahman, (1994). *Beruas: Kerajaan Kuno di Perak*. Kuala Lumpur: Jabatan Muzium dan Antikuiti.
- Othman Mohd Yatim, (1988). *Batu Aceh Early Islamic Gravestones in Peninsular Malaysia*. Kuala Lumpur: Jabatan Muzium dan Antikuiti.
- Othman Mohd Yatim, (2006). *Batu Aceh Early Islamic Gravestones in Peninsular Malaysia*. Kuala Lumpur: Jabatan Muzium dan Antikuiti.
- Suprayitno, (2010). *Makam-Makam Diraja Perak: Sumbangannya Kepada Asal-Usul Kerajaan Negeri Perak Darul Ridzuan dan Pengaruh Aceh di Negeri Perak*. Pulau Pinang: Penulisan tesis Phd. Universiti Sains Malaysia.
- Shellabear, W. D, (1986). *Sejarah Melayu*. Petaling Jaya: Fajar Bakti.
- Syeid Naquib al-Attas, (1969). *Preliminary Statement on a General Theory of the Islamization of the Malay-Indonesian Archipelago*. Kuala Lumpur: Dewan Bahasa dan Pustaka.
- Wheatley, P., (1961). *The Golden Khersonese*. Kuala Lumpur: Universiti Malaya Press.
- Wilkinson, R. J., (1971). *Papers on Malay Subjects*. London: Oxford University Press.